

Úrskurður

Agamál nr. 50/2018-2019

Viðburður:	Leikur Grindavíkur gegn Stjörnunni í átta -liða úrslitum Íslandsmóts mfl. kk. sem leikinn var 29. mars 2019.
Kærði:	Ungmennafélag Grindavíkur
Kærendur:	Dómarar leiksins

Málavextir

Hinn 1. apríl 2019 barst aga- og úrskurðanefnd atvikaskýrsla dómara eftir framangreindan leik, sbr. 1. mgr. 6. gr. reglugerðar um aga- og úrskurðarmál (hér eftir reglugerðin). Í skýrslunni kemur fram að þegar tæpar fimm sekúndur voru eftir af leiknum og leikurinn var stöðvaður hafi smápeningum verið kastað inn á völlinn af svæði áhorfenda Grindavíkur. Einn smápeningur hafi lent í höfði leikmanns númer 9, Antti Kanervo, í liði Stjörnunnar. Við skoðun á upptöku sjáist hvaða áhorfandi þetta hafi verið en gæslu hafi verið ábótavant af hálfu heimaliðsins, Grindavíkur, þó svo að erfitt sé að koma í veg fyrir slíka uppákomu.

Aga- og úrskurðarnefnd óskaði eftir nánari skýringum frá dómurum leiksins á því með hvaða hætti þeir teldu gæslu hafa verið ábótavant umrætt sinn. Í svari frá dómurum sem barst í kjölfarið kom fram að þeir teldu að of faliðað hafi verið í gæslunni og gæslumenn lítt áberandi. Þeir vísuðu þó til fyrri afstöðu að þeir teldu erfitt að koma í veg fyrir að slíkt ætti sér stað.

Athugasemdir Grindavíkur

Athugasemdir bárust aga- og úrskurðarnefnd frá Grindavík þann 3. apríl 2019. Þar kemur fram að félagið harmi atvikið því slíkt eigi hvorki að sjást né líðast. Fyrirsvarsmenn hafi rætt við umræddan áhorfanda sem hafi beðist afsökunar. Jafnframt hafi verið skorað á hann að biðjast afsökunar í eigin nafni. Hvað varðaði gæslu á leiknum að þá hafi félagið alltaf fylgt því sem farið hafi verið fram á og lagt fram það sem þurfi til þegar „stórir leikir“ eru. Ekki er endilega um það að ræða að sjálfboðaliðar í gæslu hafi reynslu af slíkum störfum en yfirleitt sé þetta fólk úr röðum félagsins. Félagið telji gæslu ekki hafa verið ábótavant umrætt sinn hvað varði þetta atvik þar sem ómögulegt sé að koma í veg fyrir að slíkt eigi sér stað.

Niðurstaða aga- og úrskurðarnefndar

Samkvæmt 1. mgr. 3. gr. reglugerðarinnar hefur aga- og úrskurðarnefnd fullnaðarlögsögu yfir þeim málefnum, sem koma upp innan vébanda KKÍ og varða lög og reglur þess eftir því sem við á. Nefndin skal byggja niðurstöður sínar á lögum og reglugerðum KKÍ.

Í ákvæði h. liðar 1. mgr. 13. gr. reglugerðarinnar kemur fram að ef áhorfendur gerast sekir um vítaverða eða hættulega framkomu gagnvart leikmönnum, dómurum eða starfsmönnum eða öðrum áhorfendum leiks, er aga- og úrskurðarnefnd heimilt að svipta viðkomandi heimalið heimaleikjum og/eða úrskurða það til greiðslu sektar til Körfuknattleikssambands Íslands að mati nefndarinnar. Ef atvik þykja ekki það alvarleg að svipting leikja verði úrskurðuð, er aga- og úrskurðarnefnd heimilt að áminna viðkomandi félag og/eða gera ábendingar er lúta að tryggja öryggi aðila og dómara. Verði um ítrekuð brot að ræða innan keppnistímabils þrátt fyrir áminningu, og ekki hafi verið orðið við ábendingum aga- og úrskurðarnefndar, skal svipta viðkomandi lið að lágmarki tveimur heimaleikjum. Aga- og úrskurðarnefnd skuli meta heimaliði til málsbóta ef sannað þyki að áhorfendur útiliðs hafi átt upptök að, eða stærstan þátt í, hinni kærðu framkomu. Aga- og úrskurðarnefnd skuli meta heimaliði það til málsbóta, ef öryggisgæsla teljist hafa verið nægjanleg. Þá segir í m. lið sama ákvæðis að ef forystumaður aðildarfélags, sem ekki er á leikskýrslu, eða áhorfandi gerist sekir um vítaverða eða hættulega framkomu gagnvart leikmönnum, dómurum, þjálfurum eða öðrum sé heimilt að sekta viðkomandi aðildarfélag um allt að kr. 50.000. Ef brot teljist alvarlegt eða um ítrekun er að ræða sé auk þess heimilt að setja viðkomandi lið í heimaleikjabann, þar til öryggi leikmanna, þjálfara og annarra teljist tryggt. Enn fremur segir í ákvæði 7. gr. reglugerðar um körfuknattleiksmót að félög beri ábyrgð á því að framkvæmd heimaleikja þeirra fari fram á eðlilegan hátt. Í því felst m.a. að tryggja öryggi leikmanna, dómara og annarra starfsmanna leiksins og áhorfenda.

Aga- og úrskurðarnefnd telur háttsemi viðkomandi áhorfanda í umrætt sinn mjög alvarlega. Slík háttsemi telst að mati nefndarinnar til vítaverðrar og beinlínis hættulegrar framkomu sem á engan hátt er hluti af leiknum. Er það mat nefndarinnar að hið kærða lið skuli hljóta áminningu vegna hins kærða atviks og greiða sekt til Körfuknattleikssambands Íslands. Hvað varðar heimild til að setja hið kærða lið í heimaleikjabann á grundvelli framangreindra ákvæða telur nefndin að gæta verði meðalhófs við beitingu svo íþyngjandi úrræðis, þrátt fyrir alvarleika málsins, en einnig telur nefndin að almennt sé rétt að beita þyngri viðurlögum þegar um ítrekun er að ræða. Í þessu sambandi vill nefndin einnig að vísa til þingsályktunartillögu sem samþykkt var á körfuknattleikspingi Körfuknattleikssambands Íslands hinn 16. mars sl. Samkvæmt þeirri tillögu ber stjórn Körfuknattleikssambandsins að bæta inn í viðeigandi reglugerðir úrræðum til að takast á við óviðeigandi hegðun áhorfenda á leikjum. Þar kemur einnig fram að nauðsynlegt sé að Körfuknattleikssamband Íslands geti tekið á málum einstakra áhorfenda og/eða hópa sem þykja hafa gengið of langt í hegðun sinni. Núverandi úrræði séu ekki nægilega víðtæk og því sé nauðsynlegt að bæta regluverkið. Með vísan til þess sem að framan er rakið hlýtur

hið kærða lið áminningu vegna hins kærða atviks og skal greiða sekt að fjárhæð kr. 50.000 til Körfuknattleikssambands Íslands.

Úrskurðarorð

Hið kærða lið, Grindavík, sætir áminningu og skal greiða sekt til Körfuknattleikssambands Íslands að fjárhæð kr. 50.000 vegna háttsemi áhorfanda liðsins í leik Grindavíkur og Stjórnunnar í átta - liða úrslitum Íslandsmóts meistaraflokks karla sem leikinn var þann 29. mars 2019.

Reykjavík, 10. apríl 2019

Þórólfur Heiðar Þorsteinsson, formaður
Björgvin Halldór Björnsson, varaformaður
Hrefna Dögg Gunnarsdóttir, varaformaður
Birkir Guðmundarson
Kristinn G. Kristinsson
María Káradóttir